



ALL INDIA RADIO

REGIONAL NEWS UNIT – SILCHAR

MORNING NEWS BULLETIN

BENGALI

5 OCTOBER 2024

7:35 AM IST

=====

রাজ্যের প্রশাসনিক ব্যবস্থাকে সুষ্ঠুভাবে পরিচালনা করার লক্ষ্যে আজ কাছাড় জেলার লক্ষীপুর সহ ২২ টি জেলায় সমজেলার কার্যালয় উদ্বোধন করা হবে। মুখ্যমন্ত্রী ডঃ হিমন্ত বিশ্বশর্মা আজ কামৰূপ মহানগর জেলার জালুকবারী সমজেলা আয়ুক্তের কার্যালয় উদ্বোধন করবেন। কামৰূপ মহানগর জেলার দিসপুর ও নিউ-গুয়াহাটীকে, হোজাই জেলার লামডিং, নগাঁও জেলার কলিয়াবর ও রহাকেও সমজেলা হিসেবে ঘোষণা করা হয়েছে। অনুরূপভাবে বঙ্গাইগাঁওয়ের অভয়াপুরী, কামৰূপ জেলার রঙ্গিয়া, মরিগাঁওয়ের লাহরিঘাট ও জাগীরোড, বিশ্বনাথের গহপুর, ডিব্ৰুগড়ের নাহরকাটিয়া, দুলিয়াজান, তিংখং ও খোয়াং, শিবসাগরের নাজিরা ও ডিমৌ, চরাইদেও জেলার মাহমরাইকে সমজেলা হিসেবে ঘোষণা করা হয়েছে। উল্লেখ্য পর্যায়ক্রমে আসামের ২১টি জেলায় ৩৯টি সম-জেলা কার্যালয় উদ্বোধন করা হচ্ছে। এর অঙ্গ হিসেবে গতকাল প্রথম পর্যায়ে ১৭ টি সমজেলা কার্যালয় উদ্বোধন করা হয়েছিল। এই প্রশাসনিক সংস্কারমূলক ব্যবস্থার মাধ্যমে এখন থেকে সাধারণ নাগরিকরা জমি রাজস্ব, ন্যায় ব্যবস্থা, উন্নয়নমূলক প্রকল্প রূপায়ন, খাদ্য ও অসামরিক সরবরাহ আবগারী ইত্যাদি বিভিন্ন জেলা পর্যায়ের সেবাগুলো সমজেলা কার্যালয়ে লাভ করবেন।

এদিকে রাজ্যের জনস্বাস্থ্য কারিগড়ি, পর্যটন, দক্ষতা, নিয়োগ ও শিল্পোদ্যোগ বিভাগের মন্ত্রী জয়ন্ত মল্লবরুয়া আজ লক্ষীপুরের ফুলেরতলে সমজেলা কার্যালয় উদ্বোধন করবেন। মন্ত্রী গতকাল করিমগঞ্জ জেলার রামকৃষ্ণনগর ও পাথারকান্দি দুটি সমজেলা কার্যালয়ের উদ্বোধন করেন। রামকৃষ্ণনগর সমজেলা কার্যালয় উদ্বোধন করে ভাষণ প্রসঙ্গে মন্ত্রী বলেন যে মুখ্যমন্ত্রী ডঃ হিমন্ত বিশ্বশর্মা রাজ্যের ৩৯ টি সমজেলার সঙ্গে রামকৃষ্ণনগরকে সমজেলা করে জনসাধারণের জন্য বিশেষ সুবিধা প্রদান করেছেন। এই অঞ্চলের জনগণকে বিভিন্ন

সরকারী কাজে এখন থেকে আর করিমগঞ্জ জেলা সদরে যেতে হবেনা বলে তিনি মন্তব্য করেন। মন্ত্রী বলেন যে এই সমজেলা স্থাপন করার ফলে জনসাধারণ জমির রাজস্ব, উন্নয়নমূলক কাজকর্ম, কল্যানমূলক প্রকল্পের সেবা, প্রশাসনিক সেবা, পঞ্চায়েত ও গ্রামোন্নয়ন, দুর্যোগ ব্যবস্থাপনা ইত্যাদি নাগরিক সেবা পেতে সক্ষম হবেন। বর্তমানে এই সমজেলা কার্যালয়ের কাজকর্ম পর্যটন বিভাগের গেষ্ঠ হাউসের অস্থায়ী কার্যালয়ে চলবে। এক দেড় বছরের মধ্যে সমজেলার স্থায়ী ভবন নির্মাণ করা হবে বলেও তিনি জানান। মন্ত্রী শ্রী বরুয়া গতকাল পাথারকান্দি পূর্নবিভাগের ডাক বাংলার পাশে পাথারকান্দি সমজেলা কার্যালয়ের উদ্বোধন করেন। এ উপলক্ষে পাথারকান্দি বিসর্জন ঘাটে এক অনুষ্ঠানের আয়োজন করা হয়। উভয় অনুষ্ঠানে রামকৃষ্ণনগর সমজেলা আয়ুক্ত ধুবজ্যোতি দেব, চক্র আধিকারীক সৌভিক দত্ত, সাংসদ কৃপানাথ মালহা, বিধায়ক কৃষ্ণেন্দু পাল, বিজয় মালাকার, সিদ্দেক আহমেদ চৌধুরী, সমজেলা আয়ুক্ত মিনার্ভা দেবী আরামবাম, করিমগঞ্জের জেলা আয়ুক্ত প্রদীপ কুমার দ্বিবেদী প্রমুখ উপস্থিত ছিলেন।

গৌহাটী হাইকোর্ট আসাম লোকসেবা আয়োগের প্রাক্তন অধ্যক্ষ রাকেশ কুমার পালের সময়কালে ১৪ টি জেলা ম্যালেরিয়া আধিকারিক পদের নিযুক্তি বাতিলের নির্দেশ দিয়েছে। একজন বঞ্চিত প্রার্থীর দাখিল করা আবেদনের শুনানি গ্রহণ করে গৌহাটী হাইকোর্টের মুখ্য বিচারপতি বিজয় কৃষ্ণ ও বিচারপতি উন্নীকৃষ্ণ নায়ারের খন্ড বিচারপীঠ ১৪ টি পদের বাছাই তালিকা বাতিল করে নতুনকরে নিযুক্তি প্রক্রিয়া আরম্ভ করতে নির্দেশ দিয়েছে। লোকসেবা আয়োগ ২০১২ সালে স্বাস্থ্য বিভাগের অধীনে ১৪ টি ম্যালেরিয়া আধিকারিক পদের বিজ্ঞাপন প্রকাশ করেছিল। পরবর্তী পর্যায়ে কমিশন বাছাই পরীক্ষা ও মৌখিক পরীক্ষা অনুষ্ঠিত করে ১৪ জন প্রার্থীর তালিকা প্রকাশ করে। কিন্তু একাংশ প্রার্থীর নম্বর বৃদ্ধি করে উত্তীর্ণ করা হয় এবং শুধু মৌখিক পরীক্ষার নম্বরের ভিত্তিতে প্রার্থী বাছাই নিয়ে একজন বঞ্চিত প্রার্থী উচ্চ ন্যায়লয়ে মামলা দায়ের করেছিল। এই মামলার ভিত্তিতে গতকাল ন্যায়লয় ১৪ টি ম্যালেরিয়া আধিকারিকের পদের বাছাই তালিকা বাতিল করে।

গুয়াহাটীর আঞ্চলিক আবহাওয়া দপ্তরের পক্ষ থেকে আসাম সহ মিজোরাম, ত্রিপুরা, মেঘালয়, নাগালেণ্ড ও অরুণাচলপ্রদেশে আগামী মঙ্গলবার পর্যন্ত বজ্র বিদ্যুৎ সহ ভারী বৃষ্টিপাতের সম্ভাবনার কথা জানানো হয়েছে। আবহাওয়ার পূর্বাভাসে আসামের কিছু কিছু

এলাকায় ভারী বৃষ্টিপাতসহ ,হালকা থেকে মাঝারি বৃষ্টিপাতের সম্ভাবনার কথাও বলা হয়েছে ।

প্রধানমন্ত্রী নরেন্দ্র মোদীর পৌরহিত্যে অনুষ্ঠিত কেন্দ্রীয় মন্ত্রিসভার বাংলা অসমীয়া সহ পাঁচটি ভাষাকে ধ্রুপদী ভাষার মর্যাদা প্রদানে বিভিন্ন বিশেষজ্ঞ মহল থেকে সন্তোষ প্রকাশ করা হয়েছে । এর ফলে বিভিন্ন ক্ষেত্রে শিক্ষা , গবেষণা ইত্যাদির সুযোগ লাভ করা যাবে বলে বিভিন্ন পক্ষ মন্তব্য করেছেন ।উল্লেখ্য এছাড়া অন্য তিনটি ভাষা হলো মারাঠি , পালি ও প্রাকৃত । আসামের মুখ্যমন্ত্রী ড: হিমন্ত বিশ্ব শর্মা সামাজিক মাধ্যমে কেন্দ্রীয় সরকারের এই সিদ্ধান্তকে আসামবাসীর হয়ে কৃতজ্ঞতা ও ধন্যবাদ জানিয়েছেন ।

কাছাড়ের জেলা সৈনিক কল্যান আধিকারীক এক বিজ্ঞপ্তিতে জানিয়েছেন যে প্রাক্তন সৈনিক যাদের স্ত্রীর নামে এখনো পারিবারিক পেনশনের জন্য পি পি ও -তে অনুমোদন করা হয় নি , তাদের খুব শীঘ্র ডিসচার্জ বই , পি পি ও , ই এস এম পরিচয় পত্র , স্ত্রীর আধার কার্ড সঙ্গে নিয়ে জেলা সৈনিক কল্যান আধিকারীকের কার্যালয়ে যোগাযোগ করতে বলা হয়েছে ।
